

四庫全書

集部

欽定四庫全書

石倉歷代詩選卷三百九十六

明 曹學佺 編

明詩次集三十

李東陽

答陸鼎儀誨言

少年被纓冠側身羣賢後狂悖寡自持多言衆所咎繁辭
劇無益欲制已出口有時歌詠諧觸目遭詆詬雖言不為

謔于德實有疾三復白圭篇令人重顏厚愧無請益辭負我
直諒友陸君多雅懷指我以瑕垢翻然為起敬竦立欽雙肘
退之喜嘲狎籍諫終不受才高使之然嗟我實未有書紳古
人戒敢不佩左右感子期重陳終焉報瓊玖

贈彭民望

我家水西涯性本愛幽僻與君數携手興至忘所適溪
行緣縈紆野酌散愁寂倦來倚樹坐舉目見山色山色
忽已改離別復幾載移居在城南咫尺隔江海夜來春

風至芳思期共采道逢舊隣人茅堂復何在

與劉時雍

客從方巖來戒我作詩疾君仍索我詩謂我意所適深
言中竒病二子皆我益還從適處來便向疾中釋而我
亦何心悠悠自朝夕

與姜用貞

叢蘭絕低小隱約幽巖姿危岡有高松下影迴薄之大
小固異質託交乃其宜君本老成人我生良已遲情親

若兄弟年數兩相遺相逢即傾蓋久矣不復疑我歌貧
交行試問和者誰

其二

節過人事簡駕言適我廬一茶啜未纔童僕促迴車攬
之不肯住答我有所趨十朝不一見為我惜須臾昨夜
夢君來相見但躊躇翻思夢中言展轉一字無

十一月二十七日夜夢樓居風雨中得句云卷
簾看風樹時亡妻亦在側覺而有感續成一

章

高樓坐連牀遙碧俯平渚卷簾看風樹葉落沙上雨飄
飄輕襟散披歷層軒舉寤寐平生歡咫尺得晤語相逢
隔晨暮倏忽無定所積雪徧中庭鍾情徒延竚

吳原博修撰醫俗亭

吳君天下士愛竹比良友平生益者交意豈在杯酒亭
居衆鞅絕林卧清風久十年別江南吟諷常在口嗟吾
寡留玩性本厭塵垢願招肩輿郎徑造羲皇叟此物生

已遐斯人亦希有託君多病軀藉此鍼石手茲意予所
投君當報瓊玖

大雨有感

積雨盈我庭流水入我屋移牀就牆東豈為避煩溽瓶
罍互雜還出入泥汨汨我病不得眠喧呼煩童僕弱抱
增百憂端居繭雙足所思室豈遠咫尺限谿谷高歌寡
酬和曲罷意轉促窻紙風蕭蕭虛簷度鳴竹柴門晚當
閉日入坐秉燭

時用得詩見和似怪予破戒者用韻奉答

幽居觀物化有始終必止人生亦氣類出入樞機裏偶
落簪組間誰是巢居子筆札常繞身豈獨性所喜願為
委地藥更逐狂飈起吾生尚多闕萬壑此其涖勿厭箴
規言鷄壇有明祀

鼎儀宅分韻送其兄武儀還崑山得倪字

君家好兄弟恩義兩不睽豈惟舉止似笑語皆天倪我
本通家友三年負招携留歡極酣樂飽德無嫌儕涼秋

入庭樹風露忽已淒昔作鳳和鳴今為雁分栖悠悠滄
江上道路阻莫躋到門見桑梓登堂頌黃鯢人生重骨
肉至樂諒不齊送君東城去蔓草青萋萋

擬古出塞三首

軍行視旂旄聞向黃河曲相顧問姓名同伴為骨肉星
分良鄉爨月傍井陘宿民貧苦供給縣官告不足掾吏
飽肥羊馬飢奴無粟營門號令肅雞犬不敢掘起居有
常節幸得免笞辱

河曲二千里外險中廣夷樓蘭十萬騎倏忽路無歧邊
軍戒輕入壯士氣不持帷幄計深密功成在何時糧儲
日不繼淹留懽愆期邊疆古有患上將重興師吾知荷
戈役生死長相隨

邏騎朝出塞敵騎屢衝突我軍摧其鋒殺氣滿川窟將
驕聞裹瘡戰勝多白骨兵家貴萬全豈足較毫髮千金
買首功百金紀勲伐京軍得先陞邊卒長獨沒卑情思
上達疎賤不得謁日暮獨無言岩光見宮闕

蘭舟詩送丘蘇州南歸

幽蘭出山澤移植秋風時清芬寡流媚借問愛者誰使
君來南國舟楫長相隨狂飈逐驚波霜雪憔悴之羣芳
競歧路顏色爭紛迷蕭條動盈把此物棄如遺愛惜復
愛惜洗根濯其泥攬舟沂長江歸去兩不疑載歌蘭舟
篇獨與和者期

齊山書舍詩

浙東文獻裔吾見忠文孫讀書金華郡結屋齊山村舉

頭看青巖儼若先公存文章與節義實並茲巖尊齊山
乃支派拱立如諸昆景行在瞻仰極力窮攀援藏修三
十載獻策承明門上書乞鄉校奉祀修蘋蘩銓曹不為
覆告諭復且溫幽懷耿中夜夢與山靈言松楸我廬墓
桑梓我田園煙雲護我扉風月主我軒吾方效王事再
拜酬深恩終焉丘壑心不愧鶴與猿山靈飄然去夢覺
日已暝竭來登我堂感我思欲騫卓哉先賢後典刑我
所敦斯文孰砥柱浩蕩狂流奔老成不可作此意更誰

論

陳玉汝所藏朱澤民畫

睢陽書家流作畫如作草松根石峻嶒健筆凌絕島垂
離飄人衣盤石坐不掃鳴琴聲差差石籟風稍稍君看
蕭散姿稱彼林下老遺嫌百年內嵐氣濕不槁陳郎湖
海情得此恨不早我生不學畫入眼分醜好嘗觀耆舊
傳歎息風流少此意君獨知丹青安足道

題王維詩意圖

平田渺成湖仲夏月多雨汀鷺濕不飛林鶯濕還語村
煙多乞隣餽餉常及午柴門無鎖鑰出入隨杖屨白鷗
似相識亦足忘爾汝王丞詩家流畫格亦天與君看百
代遺摹搨尚如許吾生慕丘壑偶此繫冠組試問松下
翁幾人同出處

墨菊

白露被原隰黃菊秋始花餘馨引遙袂采掇初還家秀
色雖可玩玩久不復華入畫清且古為詩正而葩幽懷

託揮寫底用傳無涯持此問真幻無言空自嗟

題蘭為司寇何公

楚澤有幽蘭名高百花選孤根托地靈芳心應時展陽
和一披拂春色無深淺清風徧六合孰為知者鮮援琴
思昔人古意嗟已緬層厓數枝竹意若相慰勉穠華須
却避荊棘行當剪幸此挹餘芬披圖漫舒卷

聞方石先生得遺腹孫

故人喪愛子棄官歸故園空懷向平念誰候柴桑門吾

心怛如割匪獨傷弟昆竭遊舊台守遠致州人言言從
抵家後乃得遺腹孫幸辭簿書勞辦此鞠育恩竒事諒
非偶善徵詎無根綿綿千鈞力耿耿一髮存天乎豈無
知可與智者論詩成不寄遠庶以紓吾煩

題畫

騎驢下前坂山深日將晚水石何蕭條風稀髮毛短秋
聲在高樹歲去不復返遙指故人家松花當夜飯

淮海遊

愚樂傳公嘗遊淮海間士大夫贈詩成卷為補是

詩

汎彼江湖興來為淮海遊高帆駕巨浪浩蕩空中浮上
有盪胸雲下有濯足流吹簫動海月鼓枻驚沙鷗長歌
振林木逸響歸滄洲至今淮上人彷彿疑仙舟懷賢託
楚些感舊聞吳謳寧無後來者俛仰難為儔

習隱

卜築城西屋寒暑十五更西軒闢新圃遠若居荆衡踈

林見秋色爽籟聞空庭園蕪綠復徧屐印旋已平習隱
漸成癖誰當戀冠纓靜言念疇昔髣髴白幾莖素志豈
不高隨時且功名退公得委蛇聊以娛我情

野色澹蕭條城居類林壑閉門掃荒徑秋葉紛欲落園
亭襟花晚紅碧相間錯采芳意未遲及此霜露薄陶韋
去世遠古調方寂寞撫今非少年悠然念今昨

暑雨忽新霽曾軒開碧山浮雲避素月夜色明松關流
螢遞隱現宛在深林間掃石坐彈絲天風下鳴環瓊樓

正在望佇立難為攀

送青谿先生之南京吏部

昔我青雲交登朝半公輔倪君廊廟姿獨立爭快覩鐘
鏞在東序法製形貌古扣之聲錡然鯨海日吞吐蘭若
與翡翠信美安足數編維有司良拔十思得五如君能
幾人吾儕愧參伍南曹固云重暇逸詎其所願持五色
線留為山龍補

又

故都佳麗地舊里詩書門
文僖有家學歷世乃彌敦
登金學士貴踐斗尚書
尊簪纓父子繼姓字兒童
論文章兩京賦雨露三朝
恩君今歷南省祿養懷晨
昏壯哉顯揚志古道諒斯
存

題淵明歸來圖

種竹南山下種桑長江濱
消搖脫物累感激皆天真
折腰詎為屈所重在辱身
居然典午世見此羲皇民
高風迥絕代圖畫流千春
茂先昧幾決令伯傷遭迤
此翁儻

可作願卜東西隣

先府君墓焚新刻手藁感而有述示兆菴

平生讀父書句讀粗可了殘篇半零落一一費探討嗟
哉手澤存字法有遺藁憶當臨池時楮墨徹昏眊好古
窮鴻茫蒐竒極幽眇學成不用世祇以慰枯槁殷勤受
簡勞猶及趨庭早摩挲日幾過倏忽年將老有生妙鐫
刻鐵筆隨指爪經時歷冬夏計日通酉卯編成衆所歎
藝絕今應少蓼莪比周人薦芟慙屈到西郊霜露降不

日嚴拜掃祝告假文辭精誠藉薰燎悲風回輕煙橫淚
灑衰草公家有瘞曠塵務多紛擾志養久莫酬吁嗟得
為孝地下誰有知吾兒慧而天願搨萬本餘裝藏富湘
縹流傳徧朝野散布盈海嶠書香屬有託夙夜當自保
以茲結構法作室須念考雖無簞金遺世德以為寶

放船

日出風亦靜卧聞雙櫓鳴起看林巒過始知我舟行輕
鷗逆素浪幽草迎人生清暉散宿靄遠日增春明風帆

疾于鳥頗快青雲程豈不惜行路懷歸意先征浮雲西
北馳默然傷我情

謁少昊墓

古稱少昊氏云是五帝先典冊既茫昧氏名僅流傳建
都魯城東遺址有軒轅至今高原上陵樹鬱成阡豐碑
不刻字遺恨宣和年國朝重明祀香帛隨鰲玄我來訪
舊迹幸未迷榛菅四顧林莽間野意但蒼然停車問父
老相對兩無言

題徐都憲小村竹屋卷

藹藹水中村灑灑屋上竹
廬居遠山市屣脫去塵俗
朝看碧山爽夕泛晴波綠
江湖有襟帶冠屨無拘束
昔聞東吳老本出南州族
封非渭川戶乞豈鑑湖曲
溪山舊業在圖史清風續
華躋歷臺省雅尚在林谷
夢寐三十年此村還此屋
宦途復傾蓋佳畫時秉燭
指點入丹青依稀過江麓
感今復懷舊歲月如轉轂
倘遂江南遊隣哉我當卜

恭題御書藥方後

文華殿頭風日晴御書和墨烟雲生聖皇灑翰動盈案
字字盡作蛟龍形瑤箋向日光如拭中有古方三四棗
卷冊真從大典傳貽謀遠自文皇出禁廬侍直多名醫
聯班拜賜當彤墀囊中妙得君臣秘紙尾親蒙姓氏題
承恩捧下黃金闕如揭中天行日月小試人間癘氣消
深藏夜半虹光發古來用藥如用人牛溲馬勃皆通神
古來醫人似醫國病未察形先察脉我皇一念通炎黃
要開壽域歸平康願推萬念及萬物直遣四海同虞唐

成國公家槐樹歌

東平王家足喬木中有老槐寒更綠拔地能穿十丈雲
盤空却蔭三重屋憶昔前王初種時高門駟馬相追隨
五朝恩露簪纓重四世威聲草木知世間植物因人瑞
培植深根乃天意向月長留宿鳳巢排霜故作蟠虬勢
舞袖飛花遶北堂屯陰列戟森成行碧窻雨過看秋霽
紗帽風低坐晚涼古來匠石須廊廟堂中絲竹應同調
馮氏空傳大樹名王公豈待三槐兆木天老朽舊通家

樹猶如此我堪嗟願公人好樹亦好長共河山閱歲華

石城雪樵圖為李侍郎世寶賦

姑蘇城北虞山側石城峻嶒雪千尺憑高歷險去復還
獨有前村老樵客疎林落葉聞虛響遠徑荒苔斷行跡
仄磴危梯幾處通短衣長帽何人識東華一去三十載
身上塵綃無寸白夢想猶疑伐木聲樓臺不礙看山色
石田沈翁好事者點染吳縑成粉墨老氣橫隨筆底生
神交豈恨天涯隔會稽太守多歸興灞水幽人抱詩癖

有約重烹學士茶為君細掃松間石

畫馬二首

健馬奔泉如渴虹
沽馬浴水如游龍
疎身作勢蹴厚地
仰首噴沫生長風
倦思滾塵痒磨樹
似是馬身通馬語
莫將意態問丹青
天機正在忘言處

前馬奔騰後馬逐
沙苑東來曲江曲
相遭意氣兩不平
踏盡長堤春草綠
奚官一騎高如山
金環玉勒聲珊珊
會呼羣駿出雲霧
同立春風十二閑

題趙子昂射鹿圖

秋高出獵長城下碧眼胡兒騎剡馬弓如月滿箭星流
已向千山毛血灑馬前逸兔或可脫山下老麋身欲赭
彼貪但為口腹謀不見巴西放麋者吳興王孫燕薊客
酒酣興發時潑墨極知紈綺足風流忘却河山限南北
噫吁噉薛郎未掛天山弓披圖仰面來天風

題衍聖公所藏畫竹因憶闕里南園之勝故篇
終及之

高堂四壁歌聲起，戛玉鳴金奏清徵。
摩挲素練往復還，似有秋風生爪指。
古來寫竹如寫神，倉卒接應皆天真。
想當磅礴向空廓，已覺意象超風塵。
我家舊傍瀟湘住，滿地清陰不歸去。
每開圖畫即江湖，長怪軒窗隔煙霧。
闕里牆東縣令家，名園種竹不種花。
蹊回徑折入蒙翳，下有泉水無泥沙。
長流瀼瀼穿林響，短髮蕭蕭助森爽。
舊路無因縮地看，新梢定見參天長。
北客南遊興未償，此時此景故難忘。
擬刻琅玕三百字，為渠題寄墨君堂。

題湖山春晚圖

湖船著水平無舵篷上使篙篷下坐山光四面錦屏開
橋影中天綵虹卧輕鴉拂樹還千點老鶴叫空時一箇
宴客遙將綺席隨遊人不惜青鞋破江南風物今餘幾
看畫題詩兩無那却忘湖山畫不如他年自買扁舟過

聚禽圖

西塘日落秋波綠雨雨鴛鴦水中浴野鳬沙雁忽西東
落翠樓紅亂人目鳴鳩愛雨兮鵲愛晴宿者自宿行自

行惟有白鷗忘世事朝來暮去兩無情

題楊妃出遊圖

沈香亭上春日裏海棠睡足風吹起玉驄馱醉出華清
頭上綠雲嬌不理內人宣索已多時金鑾供奉來何遲
有誰並轡復顧笑不是秦姨定虢姨階頭奚官執鞚走
問渠合似安郎否不然那得近前行祇許籠禽隨吠犬
君不見馬嵬坡下蛾眉愁可憐白骨埋荒丘柳絲難綰
芳魂佳應從君王萬里遊

送金太守致仕

北風蕭蕭起平陸，遠客還思舊鄉曲。
青袍白馬送君歸，楚水吳山爲誰綠。
當年獻策來京華，飄飄意氣凌雲霞。
曉日長趨九華殿，春風爛醉五侯家。
雙旌照人日杲杲，承恩獨出長安道。
西江稱子解絃歌，南國騷人怨芳草。
退身不待衰病年，懸珂結駟空留連。
三山松柏宛然在，五陵桃花亦可憐。
山中寥寥何所有，萼菜羹兼菊花酒。
相如膝上七絃琴，元亮宅邊五株柳。
清時令子居黃門，

門前冠蓋如雲屯功名去住總適意此樂悠悠安可論

歌風臺

芒碭龍氣去復來長風萬里黃雲開手持三尺視六合
酒酣獨上歌風臺大風之歌何壯哉樽酒灑淚數行下
當時聽者翻悲哀沛中小兒解擊鼓不見干戈見歌舞
三丘丘墟已滅秦兩生制作空逃魯君王自信材且雄
衣冠士人棄如土大風之歌竟何補

送武昌徐翁南歸

黃鶴磯頭秋草色高樓四面青山碧我來君去兩浮萍
忽漫相逢更南北君家舊在江城居白頭紗帽隨巾車
作客聊同薊門雁還家應憶武昌魚蘭橈桂櫂日將晚
斗酒放歌情未踈杜甫不堪垂老別嵇康曾著絕交書
徐卿有子吾所羨騎馬題詩曲江宴賦終奏入明光宮
詔成捧下麒麟殿青雲于我最交親況復山川是舊隣
送君此去情無限綠樹猿啼湘水春

荷鷺圖為薛御史作

秋山沈寥秋水濶一夜天風起蘋末萬籟凋餘錦樹空
繁花落盡紅衣脫鵲鵲瀾瀾俱無聲沙邊白鷺如有情
幽會相呼落日暝尺鯉下避寒潭清寒潭直下幾千尺
落羽迴波共蕭瑟獨立遙憐海嶼青低飛不礙江雲白
詩家畫格還相宜却憶江南初見時雍陶池上風雨集
摩詰田中煙火遲吾生頗似巢籠鳥十年塵土長安道
萬里滄浪一片秋安得閒身此中老

亨父以梅花扇寄其門人索賦一首

江頭古樹花滿株蟠虬屈鐵相縈紆微雲點綴不盈掬
風格自與羣葩殊翰林老史仙骨揮毫兩袖清香發
空梁夜半酒醒時夢斷江南滿樓月仙郎瀟灑如宗之
平生愛畫復愛詩山高水濶望不見瓊林玉樹空參差
題黃宗器秋官所藏何太守山水圖

濕雲浮空山欲動亂壑回峰互吞湧當溪獨樹雨冥冥
青苔覆地春陰重深山白石幽人居鉤簾寂寂坐看書
竹橋入林野有簌草閣傍水門無車行人細路隔山脚

曳杖前登後還却浦口輕舟信往還鐘聲遠寺空寥廓
此中可釣亦可耕不然且濯滄浪纓酒酣夢覺兩相失
此興豈獨憐丹青風流太守何侯筆三十年來已蕭瑟
君今愛惜須久傳予亦題詩坐終日

劉尚質南樓題王舜耕山水圖

溪聲潺湲雜林壑山勢蜿蜒去還却浮雲欲起未起時
半在溪頭與山脚入空高鳥飛欲盡背屋斜陽慘將落
更無剩地與閒人縱有紅塵何處着南畝老翁雙鬢斑

筆法頗似高房山少年豪宕老疎放往往醉墨留人間
平生畫癖兼山癖一見此圖三歎息愧我不如樓上人
日日開窗看秋碧

體齋宅賞蓮席上得十字

池亭雨過芳塵浥池上花開衆賓集回風忽覺翠旂翻
倒影真從彩雲濕越浦新粧水底明漢臯遺佩空中拾
剪裁似欲煩并刀浣染却愁翻墨汁根非異種難同調
身在後時終獨立已當佳麗國三千不羨艷陽春九十

桂苦蘭辛祇自憐
桃紅李媚何嗟及
酒如戀客傳不停
花似解詩催更急
坐看煙蓋晴裊裊
欲采露房秋戢戢
我狂不去當重來
鯨飲碧筍三萬吸

山水圖

驚溪練色如江色
幻出山青與雲白
山前雜樹豈知名
雲際高樓不論尺
幽泉無聲深谷窈
下作寒潭浸空碧
祇應車馬隔塵氛
但有扁舟繫沙側
溪頭老漁何處歸
手持輕櫓背斜暉
茅堂欲到恐未到
日暮山雲空濕衣

西巖兩翁共巾屨應在深山更深住南溪芳草北溪花
遙指平生釣遊處

畫山水

山家住雲深處眼見雲來復雲去朝隨爽氣入空山
夕變浮嵐掛高樹蒙茸草色迷東西石路崎嶇高復低
槿花成籬竹為障中兩幽人屹相向芒屨鐵杖烏角巾
白頭雙鬢何續紛來時似帶林霏濕坐久不知山日曛
門前落葉多仍掃故人相期苦不早香靄疑無遠寺鐘

咿啞忽有中流櫂危橋過雨苔應滑後園花殘人未老
若耶雲門未可登天姥匡廬夢空到乾坤浩蕩真無極
詩話一燈青未了絕勝王郎興盡時扁舟載雪山陰道

麥舟圖

江東故人半零落江頭石卽淚雙闕三喪未葬家苦貧
舉世今無魏州郭睢陽范郎方少年相看不語意茫然
江舟載麥五百斛揮手付之如一錢歸家侍立庭闈畔
白髮聞之為一莞亦知父子本同心若待庭趨嗟已晚

君不見慶州飢民曾告荒使君自發常平倉

觀泉圖

空山落葉無人管長林蒼蒼秋日短飛泉百尺墮空濛
下注寒潭作深淺淅瀝如同帶雨來飄搖忽被風吹斷
憶向山中初聽時乍近却疑身在遠幽尋僻探始得之
毛髮蕭騷不容縮鸚鵡江洲竟趯翻匡廬瀑布誰分剪
世間奇勝自有地應恨入山來已晚十年雙袂京塵滿
亦欲相從為一浣安得圖中二老翁芒鞋竹杖長為伴

悼鸚鵡一首東閣允德吉士

翠籠高挂層軒舉中有珍禽解人語
顧影頻迴席上燈
梳翎却避簷前雨
左旋右轉百態足
忽見昂藏為偃僂
聲名價重出比隣
婉孌情多向兒女
耳目翫能幾時
珠沈綠碎隨塵泥
玉環不繫芳魂住
繡闥猶疑曉夢遲
應憐握粟不自飽
叻渴腸空誰得知
虛令賓客生顧盼
頓覺楹障無光輝
憶昔携來隴山客
萬壑千巖幾朝夕
都將嫵色慰多愁
轉使歡聲成太息
因思異物難荼養

頗似奇才遭挫抑君不見鹽車千里駒長飢至死無人惜

畫馬歌

唐家內廐多飛龍五花墜簇金芙蓉奚官引鞵供飼秣
退朝牽過光明宮絲繩百丈鎖長柱宛轉霧鬣隨風鬢
銀床玉瓶汲宮井俯首下飲如渴虹氣噴為雲血成汗
意象矯矯騰高空當時監牧最得寵襁褓小兒皆錄功
丹青畫史皆摹狀尚以肉骨分雌雄空將盛事作粉飾

萬騎不到山川東
千年粉墨出舊譜
乍可髣髴開元中

題夏仲昭墨竹橫卷蓋陳緝熙先生之故物也

崑山夏老能筆耕
閒雲種玉看崢嶸
千條萬葉入霄漢
世間草木空有名
來持琅玕叫閭闔
坐使石燕無光晶
北人貴竹如貴玉
直似高價酬丹青
衡開丈尺直踰咫
不見枝梢見根柢
恍疑湘浦推蓬行
颯雨驚飈過雙耳
九疑山高望不極
影落洞庭清徹底
靈籟時來天樂風
釣竿不動珊瑚水
珊瑚水冷魚龍藏
此翁一去魂茫茫

江山有神故物在環珮無聲涼夜長東吳老子圖書散
南國諸生思未忘重向玉堂脩竹譜須將偃竹記篋簪

釣魚圖為葉司徒公題

兩舟同行如結隣兩翁相對各垂綸絲長水遠意不極
俱是江湖閒散身倏無忽有時交詫咫尺煙波不相借
穉子牽絲似有情前村問酒先論價江淮以南晉晷多
瀟湘向上皆風波公家正佳魚龍窟我興即在滄浪歌
滄浪歌長秋日短野水寒天迷近遠酒醒高堂看畫圖

黃蘆瑟瑟江風滿

題雁送鄧宗周憲副

黃蘆簌簌鳴秋雨北雁南征度江渚羣分旅逐各有情
側睨回看似相語啄者自啄飛者飛忽然長叫入斜暉
片時殘夢斷還續千里關山歸未歸誰令歲序多反覆
轉使道途成骨肉水有孤蔣原有粟猶勝鷓鴣一枝足
我家舊在湘江東十年祇住京塵中送君無限思鄉意
昨夜南樓聞朔風

憂旱詞

黃塵赤日無南北平田見土不見麥秋麥垂垂盡枯死
春麥雖青不盈咫秋田種少未種多田家四顧無妻子
官河水淺舟不行漕舟不載雨州名河西鈔關坐不稅
太倉稷稻何時至一春無雨過半夏貧民望雨如望赦
安得一雨如懸河坐令愁怨成歡歌我行雖難奈樂何

題袁僉事松壑圖卷

高松盤拏如攖雲哀壑動地空中聞秋聲怒呼夜濤湧

勢若萬馬驅千軍陰風蕭蕭山鬼泣水底長蛟作人立
老子橫揮似有神紛紛畫史何嗟及東臺鐵冠金石腸
携來兩袖皆風霜官船五月不知暑擲筆停杯聽山雨

題許廷冕職方畫

路轉循岡背橋回傍水根幽人不到處茅屋自成村浦
樹經秋落山鐘向晚昏偶然一携手相與倒芳樽

齋居和亨父用杜韻

禁直居仍限篇章意屢沾蟲書開素帙燈月亂疎簾舊

事逢人說新交與歲添揚郎猶抱寂吾亦愛吾潛

送茹知縣玉之新寧

乾坤三峽水今古一奇觀老覺襟懷壯貧嗟道路難
雲朝擁馬巖樹晚棲鸞萬里峨眉月青天盡處看

題倪雲林畫次倪韻

江雲亂人目江水綠人衣苔雨疑將濕林風聽漸稀
儂歌竹送越客采菱歸不見滄洲老垂楊拂舊磯

種竹

剝買城中地多應為此君涼生別院雨綠滿後溪雲秋
至不改色夢醒時一聞屢居或未免聊爾洗塵氛

春雪

兩旬三見雪雪意晚何濃照夜不知曉入春翻似冬擁
寒愁破被試淺得孤筇却作東郊雨猶堪慰老農

種竹

種竹復種竹屋西還屋東都城十日雨長夏一林風宿
土得餘潤團陰分小叢高秋想鳴珮側耳向晴空

小園即事

過雨東園暮畦蔬架已瓜分甘到僮僕沾潤與隣家學
圃非吾事憂時且歲華有懷成獨坐歌側岼烏紗

假山成戲作二首

疊石危峰起盤根古樹成竇留雲宿處溪流聲意
匠疑天巧林居見物情退朝先拄笏爽氣忽焉生
有意尋丹壑無錢買白雲岡巒纔數疊城市已平分遠
可遊松子清宜隱竹君山成謝巖叟題壁為書勲

哭張行人暉吉

十載同年淚因君更滿襟
辭家萬里遠憂國二毛侵
病減卽官俸貧揮使者金
平生冰雪操絃絕為知音

送楊維立之南京吏部

學士官高少宰尊更將奇事與君論
楊公清白多孫子
蘇氏文章好弟兄
總謂留都非散地
極知親擢是深恩
題詩合代持杯送
為有通家舊誼存

重經西涯

朔吹晴沙捲暮寒舊時樓閣記憑欄層冰耐有行人度
愛日慚非穉子歡豈謂鳴珂還故里敢將華髮戀微官
人間未少閒丘壑欲作求田計更難

春丁代祀孔子廟庭

殿頭天語下鴻臚壁水諸生掃舊廬春版署名書帝遣
夜盤分昨出神餘仰瞻地切高堅在陟降心勞左右如
三載黃扉今再命敢將遺澤負詩書

寄和劉亞卿時雍

使車停處即開衙又見胡天雪作花
王事有勞寧歎我
匈奴未滅豈論家
周田近報千倉滿
漢將虛傳六級差
但得營門歌飽士
不須天外羨乘槎

讀劉靜脩詩

百年四海一容城
是處雲山著脚行
觀物每從真意得
感時翻覺壯心驚
高松絕島凌秋勢
獨鶴空江警夜聲
多少中原詞賦手
盡將絲竹奏昇平

用韻答邵國賢

種樹長安不作陰幽居何處解冠襟聞逢北客論山價
老向南枝識鳥聲江水縱平終是險惠峰雖好未為深
祇應權入荆溪去遙聽吳歌答楚音

月下賞菊限韻東邃菴太常先生

不隨春蝶夢滕王又送秋蟬過綠楊佳客到時非舊雨
好花開處亦重陽為園恨少青山地挿帽羞看綠鬢郎
長對此花還此客縱教多病也身康

郊壇分獻得星辰一

星壇東望隔重城
複道西來步月行
萬里煙雲春散歛
一天經緯夜分明
山河地迥非塵界
金石聲高徹太清
分獻禮成頻拭目
盛時方仰泰階平

中秋獨坐

一年風物愛秋晴
獨向空庭坐月明
萬里山河皆在眼
異鄉兒女正關情
燈前有夢難歌枕
客去無心自舉觥
高閣捲簾過夜半
不知涼露濕冠纓

與表兄殷通府話別

十載重逢髮欲皤問君官況定如何山厨夜煮吳粳飯
水驛時聞越櫂歌列縣民貧勞撫字故園家近喜經過
休言不是西堂客若比西堂夢更多

蕭海釣寄蠟黃上元日出以饗客因賦一首
薄筵無物薦清宵黃蠟分香味頗饒腥帶海風崖際出
凍隨春雪酒邊消東關地僻勞相寄南客方傳始解調
不有可人佳賞在一春詩興又蕭條

哭傅曰會郎中用體齋見慰韻

秋來哭子正酸辛又悼通家意更真寄我尚題前月信
惜君猶是後生身江山荏苒年華盡夢寐分明笑語親
因與大蘇談舊事半牀風雨兩愁人

又

登科猶記歲逢辛曾見趨堂畫裏真應與傅巖為後裔
定知何遜是前身文章飾吏誰兼美兄弟論交我最親
月落屋梁秋署冷憶君還是夢中人

送吳學士克溫之南京

玉堂風月每平分北客南來又送君千里山川非遠別
兩都詞賦舊能文亭邊野興隨脩竹江上歸心駐白雲
二十年前曾此夢不勝吟望立斜曛

一舫齋詩

十畝青山八九椽卧遊聊以屋為船星槎有路疑秋泛
波浪無聲攪夜眠東海漆籌非浪語南華飄瓦亦同篇
也知白髮詩人興不在蘆花淺水邊

送衍聖公聞韶襲封還闕里

夜來佳氣繞門闌
曉聽郎君已拜官
魯郡山川歸舊國
孔林蘋藻薦新盤
田無公稅堪為養
家有遺書正好看
從此雲霄是平地
道途長為報平安

方石先生祖母趙節婦没已五十年方石以禮部侍郎誥請移為旌表為詩紀事

路接清風嶺未遙
舊鄉遺俗豈全消
百年始報生成德
六館重開節義條
星小竟隨孤月照
江清恥受惡溪潮
先生不為彛倫起
茲事因何徹九霄

魯編修鐸頒詔安南

命使炎邦帝選才狀元剛去省元來車從北斗杓前指
詔向南天盡處開史局事嚴應暫輟官袍恩重許新裁
歸裝不帶宮中物自寫黃封作壽杯

西苑焚藁紀事

史家遺草盡成編太液池頭萬炬煙天上六丁元下取
人間一字不輕傳先朝故事非今日內苑清遊亦勝緣
却上廣寒雲霧裏禁城東指是文淵

泉山書院詩

甘泉山下浥清風得似滁陽有醉翁
嵐氣每隨天早晚水聲長遶屋西東
千尋峭壁瞻依地萬頃平田灌溉功
二物古來堪比壽願登截竊寫琤琮

城南姚氏園餞劉太宰與諸吏部晚會歸得二首

不到城南又隔秋聊因送客駐行騶
林梢宿雨衣猶濕樹底斜陽席未收
豈謂東曹非舊約須知下界有仙遊

壁間謾作題名紀聚散終同水上漚

又

園上高田園下池秋來風物兩相宜紅衣落盡蓮初實
碧葉凋殘樹總垂江左故人傷別久省中仙客怪來遲
病回已覺詩情減却為情多強賦詩

雪月夜觀水精碁戲作

雪月光中夜未闌楸枰亂落水精寒情貪白戰停杯久
眼入空明下子難長怪官曹無暇日偶從愁裏得奇觀

撚鬚呵手非吾事聊復燈前凭几看

九日崔郎小會

共看西軒納晚涼滿城風日愛重陽
苔因雨積猶餘綠菊為霜遲且未黃
病裏山林心轉癖老來兒女意偏長
向時憂樂誰先後莫問江湖與廟廊

湛編脩若水冊封安南

聖朝荒服盡冠纓嶺外交南舊有名
文字不隨言語別道途長共海波平
一家兩被周封命六載三回漢使旌

天上玉堂非遠別故鄉重慰倚門情

地震齋居國賢侍郎以詩來自通州次韻一首
獨坐空堂別院深可堪無酒更無琴雙垂短雪衰年鬢
寸結寒燈半夜心露禱似聞天上語遠書如聽谷中音
朝來整笏趨朝地鐘鼓樓高月未沈

聞遂自得紅梅

載酒尋梅興未涯移栽仙館路何賒冰霜晚節元同調
桃李春風別是家三弄已聞琴入操五更應夢筆生花

芳隣擬卜千金價老朽從今莫浪誇

聞河南捷

山東羣盜復河南血戰中原萬蟻酣守似墨城誰却九
捷如曾杼尚疑三潛行不覺關山隘屢餌深防將士貪
剛道羣兇真授首又聞舟楫下江潭

團墩秋月

庾亮樓前月正明謝公墩上雨初晴清光照我雙吟鬢
此夜懷人萬里情隔竹流螢看不見繞枝羈鳥宿還驚

天涯一望鄉心切腸斷秋山笛裏聲

梅澗

地僻沙寒水更清老梅偏向澗邊橫風吹落瓣仍低隕
石壓傍枝却倒生野鶴對人輕欲舞蹇驢衝雪瘦能行
山翁只在中老看盡春光不入城

西山和許廷冕劉時雍汪時用三兵部韻

春流曲折去還來細路縈迴合更開花落幽人愁未到
日斜歸鳥併相催祇園紺老雙林樹古洞青緣半壁苔

紅袖碧籠俱寂寞新詩讀罷半憐才

又

半嶺香臺石磴斜諸空縹渺送天花新開塔寺雄西郭
舊賜經幢出內家避暑亭前泉帶雨迴龍殿下水明霞
太平天子無巡幸頭白山僧誦法華

送王侍御用之巡按湖廣

帝遣臺臣出北州繡衣青蓋擁行騶傳詞禁闕雙龍曙
攬轡高城足馬秋吳地青山當楚斷洞庭春水入江流

故園東下無多路使節歸來是畫遊

秋雨答鳴治次韻

客情搖落竟難收砌草牆蟲亦自秋月盡俸錢隨例給
雨荒書屋借人修哀歌莫倚王郎醉短髮聊同杜老羞
馬上誦詩渾不記為君歸詠水西樓

中元陪祀山陵有述

石徑巖扉入杳冥峰巒層複坐分屏天遺劒鼎神靈宅
地識河山表裏形虎衛旌旗晨擁陛龍宮燈火夜開扃

十年兩度陪鸛侶清廟歌成得再聽

黃土道中李員外同年留宿

雨澹荒溪野水昏蕭條鞍馬入空村
平沙問渡逢漁艇深樹聞鐘隔寺門
白飯青芻非舊主細泉嘉果得名園
東曹一榻分燈意夜下虛亭白露繁

送開州陳同知

十年塵土暗青袍作宦今看改鬢毛
南國才名非汨沒北州民力正煩勞
貧憐范叔惟塵甑貴識王祥有佩刀

春興不隨公事了絳紗籠月坐揮毫

候馬北安門外遊慈恩寺後園有感

亂溪流水入荒塍九曲灣頭十丈藤尋徧野亭無舊土
訪回蕭寺有遺僧蒼苔斷處看將合老樹栽時記未曾
莫怪疲僮淹送馬三年一到竟何能

與仲律飲鳴治宅用原博韻

偶陪驄馬遊三日復到城南意惘然山色見如逢舊友
菊花開不厭殘年幽居地接東陵近愛客心知北海賢

猶識舊堂曾下榻隔樓風雨賦詩眠

立春後一日席上次若虛韻

地近彤樓御氣邊
苑花宮柳意先傳
三冬閨月留餘日
兩度風光共一年
庭淺恨無投轄井
酒窮須辦典衣錢
瓦杯陶鼎能留客
未愧烹肥與擊鮮

次韻白宗璞員外使密雲途中遇雪

薊門春雪尚能花
却望邊城路更賒
應律未回燕谷暖
舞風還濕漢旌斜
青山骨聳如爭瘦
白雪詞工欲闕葩

此夜宮綾寒不寐未知清景屬誰家

大雨亭大詩屢至疊前韻

急雨雄詞欲鬪淙奚論陸海與潘江傾殘峽水聲猶壯
挽盡天河力未降敢謂中流堪比障故知行潦不宜艘
高歌忽斷浮雲外猶有晴虹照夜缸

碧筩酒次韻東傳曰會中書

翠盤深處碧為筩照見池頭一丈紅別有清風來地主
巧將甘露奪天公香隨綠蟻應前度心入靈犀已暗通

我不負花還負此不勝餘興繞堂中

少保商先生壽七十

白頭歸老荷君恩一代勲名衆所尊自古年華稀七袞
本朝科甲重三元海中仙子長生錄洛下先生獨樂園
恠見台光映東壁郎官又侍紫微垣

次韻答王世賞夜雨感懷

何處吟詩成不寐夜窻殘夢雨來時清聞木葉隨空遠
瞑覺山鐘到枕遲千里關河遊子恨一年生事寧人悲

萬間大廈君須作不用歸心繞故籬

西山

日照西山紫翠生雨餘秋色更分明
蜃樓出霧東浮海雉堞連雲北繞城
舊識郵亭猶問路漸多僧寺豈知名
十年幾度登臨約不盡平生吏隱情

夜窻聽雨

瀟瀟殘雨入深更半灑疎窻半拂楹
芳草池塘應有夢落花庭院不勝情
聽疑野寺昏鐘遠望憶江船夜火明

明日曉晴須出郭
葛衣藤杖一時輕

糝徑楊花

漠漠楊花帶遠天
舞如輕雪糝如氈
徑當僻處隨人到
春向多時著意偏
地濕似沾前夜雨
日斜猶颺隔溪煙
春光到此真須惜
莫愛牀頭沽酒錢

經廢道院

偶從樵客看棋回
回首仙宮跡已頽
歲久荒碑橫蔓草
日長飢鶴咏蒼苔
空聞河上仙翁去
不見山陰內史來

更說前朝封禪地玉符金秘有人開

次太子太傅余公登鎮朔樓韻三首

邊城勝槩拱皇都傑閣東來眺望孤落日平沙隨地遠
澹煙飛鳥入空無中原將帥歌周伐北土山川盡禹敷
欲識老臣經濟畧武侯營陣有新圖

鼓角聲高起畫簷坐來雙鬢幾莖添三邊戍久衣重換
二月寒多草尚纖邊地敵情嗟易變漢家兵食恐長淹
知公不似征西將醉下南樓月滿簾

北來風物感重遊，又上孤城百尺樓。
白骨川原遺舊恨，荒田禾黍動新愁。
華夷地仰威名重，臺省官兼位望優。
從此黃河南下路，不教塞馬飲長流。

世賞席上次韻夏提學

坐久莓苔欲滿庭，屐痕猶帶雨時青。
京塵盡斷車馬迹，山色曉看雲霧屏。
鸚鵡籠深空望眼，鳳皇巢近有棲翎。
相思只恨西垣夜，長怪東堂夢易醒。

厓山大忠祠

汴城杭郡總丘墟三百年來此卜居海內山河非漢有
嶺南民物是周餘行宮草草慈元殿講幄勤勤大學書
辛苦相臣經國念有才無命欲何如

北風吹浪覆龍舟溺盡江南二百州東海未填精衛死
西川無路杜鵑愁君臣寵奪三朝共夷夏興亡萬古讎
若遣素王生此後也須重紀漢春秋

送平江伯陳公漕運還淮安二首

賢勞三世服王家千里山川道路賒周甸土中南北貢

漢河天上往來槎晨揮玉塵風生座夜拂銀燈劍有花
聞說江淮多故老風流皆作祖侯誇

朝廷漕運仰南東百里關河屬會通勝國封疆還薊北
西山泉派出城中舟車坐惜千金費畚插虛勞累歲功
猶有腐儒憂國念欲將經國問元戎

世賢雙生一子夭死慰之以詩

城東瓜熟子離離長向西園記送時正愛春風聯蒂好
坐看寒雨一枝垂人生得意難為樂造物何心亦妬奇

從此柯條終遠大為君重誦古綿詩

薊門煙樹

薊丘城外訪遺蹤樹色煙光遠更重飛雨過時青未了
落花殘處綠還濃路迷南郭將三里望斷西林有數峰
坐久不知遲日暮隔溪僧寺午時鐘

送崔指揮謙漕運還大河

滯雨濃雲黯不收漕歌聲動木蘭舟星稀禁闕天初霽
水落長淮地始秋國計已隨山共積鄉心應寄雁深愁

山南後裔聲名在要識清朝有壯猷

重謁茂陵

寢樹寒聲起夜颼
載聞清廟有歌辭
昂湖已逐羣龍化
周馥空傳八駿馳
千古山川神陟地
三年祥禪禮成時
微臣亦抱劬勞恨
萬事傷心怱賦詩

賜枇杷

尚方珍果賜新嘗
分得江南百顆黃
遠道不妨經月暑
冷枝疑帶隔年霜
龍箋帖罷名初散
翠籠開時手亦香

歸領君恩薦家廟不禁清淚滿衣裳

寄莊定山

六峰東面一江橫此老逃名竟得名山屋到秋驚雨破
野舟閒日任潮生消愁物已杯中辦得意詩從枕上成
三十年前携手地寺門斜月晚鐘聲

舟發張家灣宿河西務

蒼茫正合塵中眼縹緲真乘水上舟江月海雲疑是夢
畫圖詩卷坐消憂沙邊細浪隨鷗鳥樹裏青山入柁樓

行盡驛亭三百里五更風急住灘頭

早發滄州

片帆輕舸發滄州野樹離離散不收
兩地傷心河上草一燈殘夢渚西樓
塵生曉市人煙集霧擁春城水氣浮
我欲憑高問歸雁瀟湘何處可維舟

登雨花臺

高臺欲上雨濛濛虎踞龍盤在眼中
萬古青山還洛下一丘黃壤自江東
謝公著屐何曾到梁武談經亦已空

好是五陵歌酒地年年芳草恨春風

遊金山寺

楚纜吳檣萬里還夢魂長在水雲間境當絕勝多逢寺
江到中流合有山鵲嶺高秋增突兀龍宮深夜鎖潺湲
謝公無限登臨興不為蒼生暫解顏

與隆平侯張公宣城伯衛公遊靈應觀

小有天高豈易攀珠宮元不隔人寰潭龍抱霧晴猶黑
庭鶴梳風午正閒過嶺松聲聞浙瀝卷簾山色見孱顏

青童兩兩清如玉緩聽仙歌滿樹間

是日莊孔陽司副自江浦來會夜宿江上次明

仲韻

黑髮相逢是壯年別來心緒轉茫然如何綠酒孤蓬夜
正在黃花九日前笑我遠同江浦雁看君清比定山泉
江流恨不歸西北回首荒城萬樹煙

九日渡江

秋風江口聽鳴榔遠客歸心正渺茫萬古乾坤此江水

百年風日幾重陽
煙中樹色浮瓜步
城上山形遠建康
直過真州更東下
夜深燈火宿維揚

過丁字沽

十月南風不受呼
須將短日赴長途
僧鐘已及午時飯
官舫纔過丁字沽
新月此回真見汝
故鄉何處尚遲吾
關河百里南來雁
欲

天津

玉帛都來萬國朝
梯航南去接天遙
千家市遠晨分集

兩岼沙平夜退潮貢賦舊通滄海運星辰高象洛陽橋
河山四塞喉襟地重鎮還須擁使輶

次日大雨入夜喜而有作

打窗鳴雨忽來過坐聽歡呼雜擢歌沙口渡喧人語亂
枕頭風急水聲多塵心最渴真消得農事雖宜奈晚何
七十二泉雲霧裏可能流潤入官河

泛南池有懷南溪聖公

輕舟別浦路迢遙危石虛亭影動搖雲去好山爭入座

雨來新水欲平橋多情留客空杯酒舊事傷心但柳條
今日我來還我去小山叢桂竟誰招

雜畫絕句

雪滿千山路茅堂只數椽幽人與脩竹相對不知年
春岸桃花開江頭夜來雨借問垂釣翁中流深幾許

雜畫二絕

穉子牽衣泣隣翁答語喧歸人定何處風物似羌村
地僻長宜靜卽潛亦愛貧貧家不釀酒自有問奇人

白頭翁畫

莫道春風好春風易白頭君看花裏烏亦有世間愁

蓮花

不見峯頭十丈紅別將芳思寫江風翠翹金鈿明鸞鏡
疑是湘妃出水中

玉簪

昨夜花神出禁宮綠雲裊裊不禁風粧成試照池邊影
祇恐搔頭落水中

題李伯時蓮社圖

誰寫廬山十八賢
白頭居士老龍眠
藥囊經卷隨行杖
知在香爐瀑布前

商山圖

行盡商山覓紫芝
不應名姓有人知
閒來共說人間事
楚漢分明一局碁

遊春圖

三月江頭花滿枝
春光物物總宜詩
杜陵野客猶多興

不是潛行痛哭時

渚蘭汀草亂春愁
病裏何心更出遊
獨立斜陽溪上望
采芳人在白蘋洲

題崔甥畫卷

谷口長松澗底藤
石橋山路晚登登
囊琴斗酒來何暮
空負寒齋昨夜燈

戴勝

園中少婦把桑歸
掩袖低眉半落暉
羞見山禽頭似錦

繭絲綵盡不成衣

題畫

十日雨多不出門
今日出門雲霧昏
扁舟欲往恐無路
何處青山江上村

春在

雁去平江煙水空
短蒲脩竹自成叢
東風一片滄浪夢
春在瀟湘細雨中

黃鶯

柳花如雪滿春城
始聽東風第一聲
夢裏江南舊時路
隔溪煙雨未分明

林郎寒鴉圖

萬里長空倦羽翰
野風殘雪歲將闌
紛紛燕雀高飛盡
獨宿空林一夜寒

墨竹

翠佩瑤環昨夜風
渚雲飛盡楚王宮
青娥舞罷婆娑曲
人在空山月影中

畫瓜

玉盤秋露水精寒
冰齒餘香嚼未殘
暑月為君清到骨
不知身在畫中看

畫菜

坐憐幽意滿閒庭
長見春畦過雨青
記得蘇郎舊風味
雲堂中夜酒初醒

墨牡丹二絕

老來青帝亦風流
年少花王正黑頭
共憶東風舊遊路

亂紅殘紫不勝愁

淨洗濃妝不受塵
墨池清賞稱詩人
休憐一朶揚州白
猶是煙花夢裏身

題畫

步屨空林散夜涼
斷橋斜帶入溪霜
仙家晚飯無煙火
猶記山中石髓香

白頭翁圖

名園芳事入新年
繡羽無聲意共傳
可是春風消不得

白頭如雪對花前

畫馬

野花開盡紫騮嘶
老樹風高落日低
十載沙場無一戰
老來林下嚙霜蹄

棄瓢圖

至人于物本忘情
瓢繫猶嫌樹裏聲
應是向來新洗耳
箇中聽得更分明

梅月圖

清溪倒影入空寒
月色梅花共一般
夜半落英看不見
暗風吹墮玉欄干

畫蝶

度竹穿花處處心
暖風晴浪影浮沉
亦知春去無多日
猶在花叢與竹陰

戴勝

五月桑園葉再生
吳蠶初熟暑風清
山禽一夜頭如錦
貧女綠絲尚未成

沈石田山水

翠竹碧桐秋氣高
洞庭南望俯亭臯
怪來落葉兼風下
知是幽人讀楚騷

畫松為卜刑部從大題


玄雲匝地黯無輝
老幹盤空勢不歸
疑是葉家堂上見
夜深風雨墨龍飛

舟次奉新驛得戴侍御同年書知于前驛相待
漫得一絕

一櫂江南本舊期
宦途多事獨栖遲
東風幾度停舟意
惟有春潮夜夜知

浦橋得淺

落日芳村無犬聲
風沙兩岸斷人行
須為繫纜空林下
坐看前溪春水生



石倉歷代詩選卷三百九十六

欽定四庫全書

集部

石倉歷代詩選卷

三百九十七至
四百

詳校官編修

臣謝振定

侍讀臣孫球覆勘

總校官進士臣朱

鈐

校對官檢討臣李學錦

謄錄監生臣陸紹臺

欽定四庫全書

石倉歷代詩選卷三百九十七

明 曹學佺 編

明詩次集三十一

倪岳

上巳會尚質宅雨雪交集得日字

四時有更謝逝者一已疾冉冉暮春至和風轉陽律感子共
寮案歡會聯暇日宿雨朝未休途潦莽四溢躊躇立前庭恐

茲節序失駕言策駕馬西瞻子雲室高樓敞雲漢良朋三與
七逍遙綜奕壺談笑散書帙勝負誰為謀諏諧不可詰舉爵
長簷下移榻更促膝酒酣氣益雄凭欄撫吟筆西山涵暮景
峰嶂眇崑崙東園桃李花繁華互蒙密西顧溢心胸默默意
已悉山陰極清賞遠駕亦超軼幽鳥林外歸新月雲間出顏
然忽復醉觴咏信非一攜手各辭去娛樂難具述顧茲交分情
豈云甘縱逸朝陽倚桐樹可以成琴瑟苟無撲斲勞終為負嘉
賓人生俯仰間飄忽等郵驛緬懷用世心劬瘁那足恤但

惜千載前古道有毅率壯志共相勉老矣徒唧唧

冬至會彭敷五宅詠史分得余忠宣

北轅不復駕元祚日以衰豺虎忽遘患江淮遂紛披偉哉青陽公毅然振蕃維孤城扼勍敵白日蔽旌麾小大數百戰征袍血淋漓豈論天道還矢死志靡移援絕城亦陷長號赴清漪妻子及賓客矢心相追隨亦有帳下士殞首甘如飴憶昔勤武備猶能事文詞轅門罷攻守朝夕談書詩遂使忠義心不以喪亂移江水鳴咽流幽

魂渺何之至今舒州城獨有忠節祠

效古意一首與王遜之秀才謝答誨言兼致別

意

故人北方來贈我錦繡段繚繞芝蘭光蕤葳華采爛豈
獨佩服佳亦足奉娛玩我欲裁為裳衣冠並輝煥踟躕
下刀尺割裂畏譏彈藉以紫雲綃置之青玉案珍重不
敢狎日夕起深憚感此無以報執別倚增歎高情託金
石雅誼薄雲漢所以十年心不假一詞贊征車難久留

搏沙聚而散忠告日已疏叢責詎能遣及時期努力敢
以污清貫臨歧意無窮引領令人惋

題竹石

湘江不可渡披圖開我心萬玉倚晴碧彷彿湘山陰清
商疎毛髮蒼雪何蕭森霜寒白石瘦林迥青煙深危稍
拂層巘遠黛迷孤岑泠泠發天籟悠悠引鸞音幽貞良
足娛密陰還相臨懷哉冰雪沍挺挺紛難侵佳境渺在
望何當遂招尋臨風意無限因之感微吟

題蘭寄浦城故人潘醫學廷瑞

猗蘭在空谷幽人時采之采之結為佩將以遺所思楚
水有餘波湘纍有深辭孤貞諒自保白首以為期

尼山春曉圖為衍聖公題

尼山鬱嵯峨孕靈慨千古深根起西周雄鎮自東魯方
春生意敷潤澤回厚土朝陽麗層顛煙霞互吞吐林姿
日萬變奇秀不可數豈獨泰岱宗聳特出寰宇雲孫國
上公雅志紹遐武攬勝入圖畫埜色在庭戶羹牆有至

念仰止亦堪觀乘閒如一登羣峰固應俯

送劉都閫景昌西征

桓桓羆虎羣見此劉將軍敢戰衆莫敵勇力時所聞從
征二十載巍然樹高勲腰間千金劍手中七星文摩挲
冰雪寒揮霍日月昏携之向西極願言靜妖氛遠涉青
海波近躡玉關雲壯遊方在茲破虜何足云

蘇武牧羊圖為劉閣老祐之

子卿重遠使武皇侈邊功如何常勝徒竊搆單于中身

拘志弗移抱節甘長終收歿豈望乳聊以安其窮迢迢
北海上終見南飛鴻廿年歸絕域千載憐孤忠麒麟耿
遺像丹青照旻穹翻嗟茂陵樹落日生悲風

擬上乞休之疏復疊前韻伏伺恩命未下益用
悚然疏藁既成遂復著筆用識鄙懷而已

穠華逞桃李孤芳笑蘭菊剖心誰與明朋足空自哭愁
夢積雨驚望眼浮雲觸已判百念冷寧遺一身辱媚時
非所能守已聊亦足行藏固由天進退詎云谷薄田猶

可耕大帶那須束
遐哉謝交遊
允矣樂幽獨
絕絃韜我琴
韞積全吾玉
擬辦季鷹舟
豈待巫咸卜

墨梅

歲華欲晏嚴冰霜
山林萬木皆摧傷
天意獨爾諸孤芳
根柯屈鐵何堅剛
冰花競發先春陽
傲晚六雪紛迴翔
珠璣錯落生夜光
天風習習飄清香
孤射仙人整靚粧
鉛華淨洗曳素裳
江妃緩步鳴佩璫
縞袂輕舉聲鏗鏘
翠禽飛來月色涼
玉笛吹斷空徬徨
舉杯澆我鐵石腸

浩歌一曲天茫茫

挽棠溪處士肅菴江先生

誅茅結屋臨棠溪，閉門讀書人未知。
雄才不復為世用，致君有術嗟無時。
壯志空然成白首，獨與棠溪作賓友。
有酒可酌詩可吟，脫落煩羈肯輕受。
神遊何處招不還，西風薤露歌聲殘。
魂去棠溪溪月白，魂返棠溪溪水寒。
廿年葬骨黃甘道，隴樹淒迷多宿草。
青雲不負舊衣冠，白面孤兒致身早。
我歌為君重慘神，古來豪傑多沉淪。

埋光鏟采老丘壑千載悠悠知幾人

春閨怨

憶妾與君初見時烏雲挽髻橫蛾眉嬋娟思義兩相得
偕老有願天應知年來何事輕離別君向江南妾江北
夢魂常逐暮雲飛音書久與秋鴻絕清明三月見春殘
深閨猶自怯春寒臨粧漸覺鉛華改閉戶誰憐花鳥闌
脉脉愁來心欲死空向春風怨羅綺沈沈簾幕易黃昏
月光獨照紗窗裏年年見月缺復圓獨怨夫君去不還

尋君欲抱琵琶去一曲相思和淚彈

三鷺圖

新荷織風翠如剪屬玉孤鳴水波卷何時舊侶雙飛來
並逐滄浪弄清淺羽雪經春猶未消頂絲颺日輕飄飄
窺魚來往思無限高潔不受漁人招君不見畫圖彷彿
差相擬千古長憐魯文子

戲題素扇短歌

君不見秋空月十二欄干照圓缺金波半瀉落蒼茫欲

與人間洗炎熱又不見春空雲卷舒重疊成氤氲一片
飛來不盈把翛然殿閣生微薰匠心經營削寒玉方寸
機關巧裝束雲青月白指掌間伐盡剡藤猶未足我欲
揚仁風置之懷袖中乘時致身貴有用乾坤闔闢誰為功
赤日遲遲駐南陸却憶閭閻苦蒸溽咫尺一動挫引領
望清肅雲成蓋兮月有陰卷舒圓缺皆天心安得春雲
秋月千萬里盡令四海除煩襟

題鶴仙為諸鍊師

湘江水深流不竭
湘山雲間還崕岬
黃鶴樓頭鐵笛聲
一聲吹落長空月
主人獨傍闌干望
仰見一鶴西南翔
上有仙人醉不醒
也知倒盡瑤池觴
瑤池宴罷日色晚
跨鶴飛來不知遠
霞裾行逐天風長
放浪人間會須返
相逢相別君莫愁
遲當携爾登瀛洲
攬衣上鶴復飛去
但見湘雲寂寂江悠悠

送劉時雍赴閩藩叅政

新柳初黃新柳綠
兩檠如飛片帆速
使君欲發須少留

聽我離歌寫中曲與君結交二十春重是同年兄弟親
玉堂退直共書史金闕趨朝聯佩紳我慚迂朽百無用
君向我曹轉增重白面書生久議兵赭衣將士皆知頌
指揮籌策功名多一官濡滯如君何閩粵分藩信小試
金緋煜煜皆恩波海道澄清藉賢守亦是同袍舊時友
時同年姜用貞為汀守善捕盜有聲烽煙不試瘴煙銷君往臨之復何有
喜君雅識毫髮精喜君雅操冰霜清獨憐君今別我去
千里萬里難為情短歌易盡斜陽暮執手踟躕立中路

男兒壯志輕別離極目青雲渺鷗鷺

贈李都閫士章

玉帳坐生風將軍冠世雄
雕弓控明月寶劍撫晴空
笳鼓軍容肅旌旗敵壘空
清朝有麟閣行見紀元功

曉發女兒寺

帆開天欲曙星斗尚招搖
漸覺鄉居遠方驚客路遙
不
禁風獵獵相送水迢迢
夜泊知何處晴雲隔暮潮

草亭都尉西涯學士兩以正月四日同復命奉

天殿有詩紀之輒賦一首

南北馳驅異東西奏對同翻思三載上又是五更中好事傳青瑣新篇出綵笥如聞雙鳳語噦噦在梧桐

寄賀屠元勳都憲巡邊再用韻之作

建節風霜地驚心塞草秋弓刀深警戍鼓角遠鳴樓詩為籌邊得名因制虜留長城今有託高爵會須酬

又

荒涼臨絕塞搖落值高秋古鎮山當壘孤城樹映樓戍

兵深可念驛騎暫須留却憶勞行役清吟誰與酬

三日晚泊和合驛

晚投和合驛地近久知名茅屋孤村斷煙波一棹輕冰
痕沙半坼春色柳初榮自信儒官冷無勞候吏迎

送陳師召侍講陞南京太常少卿

載酒都門道春風花滿樓永懷別後事須憶醉中言求
友長憐子居官屢得孫何時依舊約聯佩披西垣

九日遊陳氏西園即席次鏡川楊學士韻

紅葉明孤嶼黃花媚一川山童供午餉野老刈秋田歸
鳥高還下閒雲往復旋試看村社日扶醉說豐年

又

酣餘步遠塍暮景自清澄籬菊未堪摘谿魚猶可罾竹
間挑晚稻荷底拾秋菱欲盡登高興攀崖更一層

出城

太平時節好閒行侵曉聯鑣出冶城涼露拂衣雞唱早
香塵擁面馬蹄輕佳山秀水如迎客煙柳鶯花儘弄晴

地勝不常人易老休教碌碌過平生

晚向

登臨興倦欲忘還歸到重城半掩關
仰見明星環北極回看爽氣滿秋山
空回白日應何補老向紅塵總是閒
我遂清遊皆帝力願將丹悃抗塵顏

藥園幽趣為四明醫士馮半軒

狂客芳園何處尋半軒東去暮雲深
雨餘脩竹春多澁月到零榆夜有陰
昌歆盆池森綠玉菊花籬落燦黃金

眼前藥物皆成趣却笑廬山只杏林

遊玉泉華嚴寺

門外寒流浸碧虛玉泉山上老僧居芙蓉雲鎖前朝殿
耶律詩存古洞書曲澗正當虹飲處好山相對雨晴初
笑攀石磴臨高頂浩蕩天風襲翠裾

和鳴治別後有懷韻

春山窈窕帶春城公暇追遊逐伴行幽壑雨晴泉響近
隔林風細鳥飛輕經過不盡山中寺歸去空題石上名

獨羨謝家芳草句，鏘然猶自向人鳴。

送董壽卿吉士赴南京戶部

清高自是玉堂仙，拜命驚看去日邊。
身屬地曹官六十，心違天陛路三千。
半山亭館閒春雨，六代臺城鎖暮烟。
同宦更逢摩詰在，思鄉懷古共依然。

元宵會鳴治宅大雪得催字

玉堂風雪坐崔嵬，欸段衝寒入夜回。
鯨海有塵飛弱絮，鼇峰無地著疎梅。
雲深不礙燒燈去，春早何須擊鼓催。

却笑儒官貧到骨也來相對一銜杯

新春感事

烽火邊城鼓角悲黃沙漠漠北風吹關山遠隔雲中戍
車馬新屯灞上師賈誼有才思報國杜陵多病為憂時
侍臣誰有如椽筆擬撰燕然第二碑

送周德源南還兼柬沈仲律

相看未久還相別把袂臨歧不可留正是驪駒驚客思
那禁燕子說鄉愁雲開潞水青冥杳雨過鍾山紫翠浮

到處定應逢沈約春城無事好同遊

端午會孟陽宅分得石榴

五月薰風送晚涼海榴成子日初長參差半向花間出
錯落偏宜葉底藏紅玉暈肌空賦色驪珠充腹半含漿
遙知歲暮重來賞醉裏須分一顆嘗

戊子新春日寄上谷諸舊遊

故人底事久無書塞徼天高雁影疎寂歷冰霜驚歲晚
芳菲風日又春初幾迴常見百年內千里相思一夢餘

却憶舊時詩社客于今賡倡復何如

雪中憶張亨父次賓之韻復用韻寫懷

坐看初雪轉霏微已覺尖寒到客衣
歲序半于愁裏過鄉心全在夢中歸
經秋寥落慵開卷長日蕭條靜掩扉
却怪故人音信絕海天空濶雁來稀

又

曉色侵人已細微早寒真欲詠無衣
蕭蕭病葉驚風墮冉冉昏鴉帶雪歸
卓筆且從臨草韻提壺誰為欸柴扉

故人多在經年別歲晚方嗟聚晤稀

晚泊天津望海有作

船窻南望路漫漫一曲滄洲俯碧湍水國雲深帆影斷
海門天濶雁聲寒離憂未信江湖遠醉眼全驚島嶼殘
回首帝京三百里不勝清夢繞長安

分韻得分字送丁鳳儀秋官南還兼柬沈仲律

故人何許惜離羣望盡天南隔暮雲秋晚風帆隨路便
夜寒霜潦入江分京華塵土仍憐客鄉國衣冠却羨君

獨有秦淮橋上月清光長憶沈休文

芳池春水

芳池一曲接銀河分得天家雨露多
新漲受風牽翠縠好山隨月墮青螺
百年蘋藻沾餘澤三月魚龍湧漫波
猶記臨流泛春酌倚欄同和濯纓歌

五月十一日王世賞侍講西園晚酌即席限韻
花底清颺醒醉顏城頭落照尚忘還
便須觴詠從今日未必林泉勝此間
綠醕浮春傾北海翠屏宜晚對西山

心驚遠道青驄騎夢入中垣白鷺班

雨中獨坐有感寄內叔盧廷弼

感舊懷鄉共寂寥天涯歸思欲飄飄
猶憐建業橋頭路曾赴長干寺裏
招樽酒有時仍夜雨扁舟何日正
春潮相逢肯惜通宵話明月遲遲玉漏遙

送沈時易少叅赴閩藩專理礦事

旬宣一道惜分携天路霜風送馬蹄
過浙有山皆置治入閩無水不通谿
梅花香冷吟情健榕葉陰濃望眼迷

聞說征徭應到骨，好施霖雨向羣黎。

冬至謁陵和吳原博韻

潑紙雲煙掃不開，齋房稠疊見詩來。
豐年正擬稱多黍，盛世真堪詠有萊。
短草夜深羸馬齧，高柯月上乳烏哀。
行囊剩有珠璣在，錯落人驚出蚌胎。

又

路繞谿湍定幾灣，坦夷纔過即孱顏。
一時直欲乘風去，五夜應須戴月還。
寒玉亂鳴谿下水，晚屏斜對畫中山。

一年兩度歌行役誰道閒官盡日間

謁狄公祠

城西親拜狄公祠袍笏森然仰令儀此地孤雲心尚在
中天落日手曾支平生事業存唐史一代文章託范碑
聞道邑民能報德春風香火重追思

過淮陰

寥落城西謁舊祠王孫踪跡正堪悲功名過眼應誰惜
籌策驚人祇自疑走狗雖亡秦鹿在北難終索漢雛危

傷心欲問淮陰水隴樹蕭蕭沒斷碑

廷試執事和陳克勤詩韻

掄材有詔屬儒林浩蕩恩光仰照臨坐近殿門天不遠
歸迂輦道日將沉羣公奏卷瞻宸翰多士登名悅聖心
明日衣冠同入賀擬從仙仗候鑾音

丙午陪祀南郊

星分虎帳護行宮煙合龍香燭上穹九奏簫韶燈影下
三嚴鐘鼓月明中精禋夜格諸壇肅和氣春回四海融

共仰祝釐昭聖德儼從周雅頌年豐

丁未慶成侍宴

五昨筵開仰聖顏從臣叨列殿東班雲開黼展韶音動
雪映鑿墀扇影間醉浥流霞傾北海歌傳湛露祝南山
掖垣散步東風裏携得天香兩袖還

孟春奉陪廟享紀事而作

祠殿森嚴楯陛重雍歌初徹燎煙濃虞周典禮千年合
文武衣冠百辟從日影漸移高閣漏露華猶拂御街松

却瞻天仗東風裏冉冉霓旌導六龍

齋宮候駕次西涯學士韻

銀河如璧護重關翠輦初臨大祀壇
映日牙旗環禁旅連空甲騎擁祠官
風雲已覺爭春麗雨雪先驚入夜寒
禮罷天門重整佩歡勝萬國正迴鑾

歲暮禘祭太禮肇行駿奔之餘喜而有作

天晴除日凍初銷聖主乘春下九霄
合祀始崇周典禮分班仍集漢官僚
寢宮簾影依龍袞輦路鑾音協鳳韶

至孝曼超千古上遺經曾見紀宗堯

奉次西涯閣老分獻韻

禮重南郊聳萬方崇壇清切紫微傍銀河影隔珠簾影
璧月光分寶炬光已擬年登歌大有却看春早報殊祥
五星順軌天心協昭假精神仰聖王

晚泊流河

迢迢客路近流河漁浦風晴起棹歌夾道短籬村巷小
兩行疎柳夕陽多

晚泊東光縣

斜日陰陰起暮笳船頭畫鼓不停撾縣門東去剛三里
正及郎官放晚衙

道中柳枝詞

楊柳新青拂水齊牽舟人正滿長堤推篷忽見中天月
遊子愁聞烏夜啼

聞道吳儂歌竹枝阿誰為續柳枝詞柳枝裊裊三千尺
解與行人綰別離

丙子新秋

梧葉驚風報早秋天邊時見火星流深閨涼夜砧聲起
總是關山客裏愁

雨窗秋思

秋雨瀟瀟向晚天虛窗坐久獨忘眠風前楊柳今搖落
一別鄉關又幾年

聞中偶題蘆雁

雁飛初到楚江頭呌破衡陽一段秋寂莫西風明月夜

蘆花如雪點汀洲

四時貓

玉雪娟娟好羽衣
小山花竹正晴暉
翻盆倒甕無心問
閒看東風蛺蝶飛

石倉歷代詩選卷三百九十七